

Diadomingo 28 di September

Bin conoce e Monumentonan Mas Antiquo di nos Pais

Bishita sitionan arkeologico den bus of cu bo mes un auto

COMO parti di e luna dedica na monumentonan organisa pa Ministerio di Turismo, Transporte, Sector Primario y Cultura, Fondo di Monumento y Monumentenbureau, Museo Arkeologico Nacional Aruba (MANA) hunto cu Fundacion 1403 y Parke Nacional Arikok ta organisa un bishita na sitionan

arkeologico riba nos isla.

Segun e ley cu ta reglamenta kico ta un 'monumento', esta e 'Ordenanza di Monumento' un monumento ta un obheto, edificio, tereno of area cu ta mas cu 50 aña bieu y cu ta di balor estetico, cientifico, historico y etnologico pa nos pais. Debi na e historia rico di



nos isla e definicion aki ta haci cu sitionan arkeologico ta e monumentonan mas antiguo di Aruba, ya cu nan ta contene obhetonan y informacion di gran balor historico, cientifico y etnografico cualnan ta refleha cu e historia di nos poblacion a cuminsa mas di 4000 aña pasa. Diadomingo dia 28 di september, Museo Arkeologico ta facilita dos bus pa transporta esnan cu ta desea di conoce y haya sa mas di e sitionan aki. Saliendo pa 10'or di mainta for di Museo na Schelpstraat, cada bus lo bishita e sitionan di Arashi y Ayo. Un bus lo bishita Cunucu Arikok situa den nos Parke Nacional Arikok, mientras cu e otro lo incorpora un bishita na e cueba di Fontein, tambe ubica den Parke.

Entre 10'or di mainta pa 2'or di atardi lo tin arkeologo, asistent di arkeologo y demas personal y boluntario di Museo na cada un di e sitionan aki pa splica tur bishitante tocante esakinan. Esnan cu ta desea esaki, por forma nan grupo di famia y amigo y bishita e sitionan aki cu nan propio transporte. Entrada lo ta gratis pa esnan cu ta bishita e sitionan den Parke riba e dia aki! Pa personanan cu ta desea di



haci uzo di e busnan cu Museo lo pone disponibel, e tour lo ta gratis, pero mester registra di antemano na Museo Arkeologico. Tur hende mester trece nan propio bebida y cuminda. E tour lo dura te alrededor di 2 ora y lo por haci uzo di facilidadnan di baño na e sitionan aki. Participantenan di e tour cu ta bishita Cunucu Arikok, mester bin cu bon sapato y mester ta den condicion pa cana di e "visi-

tors' center" di Parke Nacional pa e cunucu y bek, un trayecto di mas of menos 1 ora. E busnan lo sali pa 10'or di mainta en punto y ta carga un maximo di 40 persona cada un, pues yega trempa pa segura bo luga.

Pa mas informacion por bishita e pagina di Facebook di Museo: Archeo Aruba y National Archaeological Museum Aruba. Pa registra por yama telefon 582-8979.